

Nominaziun da l'emprima giuria federala da litteratura

■ (cp) Il Departament federal da l'intern (DFI) ha nominà ils nov commembers da l'emprima giuria federala da litteratura. Per l'emprima giada en sia istorgia vegn la Confederaziun a surdar l'onn 2013 durant ils Dis da litteratura a Soloturn divers premis federals da litteratura. En l'emprima sentupada da la giuria presidiada da Dominik Müller, l'actual president da la Fundaziun Schiller, vegn finalisà il concept da quests premis.

Nov personalitads dal mund litterar svizzer èn vegnidas nominadas per dus onns renovabels en l'emprima giuria federala da litteratura. Las competenzas linguisticas dals commembers da la giuria cuvran las quatter linguas naziunalas. Ultra da quai garantecha l'experiencia professiunala fitg diversa e largia da ses commembers che la giuria federala da litteratura haja ina profunda enlegientscha da tut ils aspects da la producziun litterara en noss pajais.

Per garantir la cuntinuitad da la lavur realisada dapi passa in tschientaner da la Fundaziun Schiller, daventa ses president actual, signur professor Dominik Müller, l'emprim president da la giuria dals premis federals da litteratura. La Fundaziun Schiller vegn en effect a surdar l'onn 2012 per l'ultima giada ses premis litterars. Per concentrar ils sforzs per promover e premiar la litteratura svizra, vegn la Fundaziun Schiller a reorientar sias activitads en l'avegnir. L'organisaziun dals premis federals fa part da las novas incumbensas surdadas a l'Uffizi federal da cultura en il rom da la Lescha davart la promoziun da la cultura (LPC).

Proximas etappas

En l'emprima sentupada da la giuria, che ha lieu anc questa pri-

mavaira, ston vegnir definidas las categorias dals premis che vegnan surdads ed er tschertas modalitads, per exempel l'inscripziun als premis. La glista da las persunas nominadas vegn fixada da la giuria e vegn communitgada la fin da l'onn. La surdada festiva dals premis vegn ad avair lieu als Dis da litteratura a Soloturn la primavaira dal 2013.

Ils commembers da la giuria

President *Dominik Müller*: professor per l'instrucziun e la retschertga al Département de langue et de littérature allemandes da l'Universitad da Genevra. *Marie Caffari*: directura da l'Institut litterar svizzer (SASB), responsabla per projects scientifics, per l'instrucziun e per il bachelor en scriver litterar da la Scola auta professiunala d'art da Berna.

Bernard Comment: scriptur, translatur litterar, directur da la collecziun Fiction & Cie da las ediziuns Seuil, editur, cussegliader per ils programs tar Arte.

Pietro De Marchi: professor titular da litteratura taliana a l'Universitad da Turitg.

Urs Engeler: editur («Zwischen den Zeilen», Urs Engeler Editor, Engeler Verlag, Roughbooks). *Marion Graf*: translatura litterara, magistra, critica litterara e responsabla da la Revue de Belles-Lettres.

Clà Riatsch: professor da lingua e litteratura rumantscha a l'Universitad da Turitg e professor envidà a l'Universitad da Friburg.

Daniel Rothenbühler: magister da tudestg e franzos al gimnasi da Köniz, scolast a l'Institut litterar svizzer e directur d'in project scientific a la Scola auta d'art da Berna.

Barbara Villiger Heilig: redactura dal feuilleton da la Neue Zürcher Zeitung e commembra da la squadra da critics litterars da l'emissiun Literaturplatz dad SRF.

Finamira dals premis federals da litteratura

L'activitad da promoziun e da motivaziun cun premis da l'Uffizi federal da cultura è sa concentrada fin qua a la domena da l'art, en la quala ils premis existan gia dapi il 19avel tschientaner, tant sco a la domena dal design, en la quala ils premis federals èn reconuschids dapi l'onn 1918.

Grazia a la nova Lescha davart la promoziun da la cultura (LPC), entrada en vigur il 1. da schaner 2012, è quest instrument da promoziun vegnì extendì al saut ed a la litteratura a partir dal 2013, ed al teater ed a la musica a partir dal 2014.

Ils premis federals vegnan svilupads en in dialog intensiv cun ils partenaris. Els permettan a las artistas ed als artists premiads, ultra dal benefizi material, da vegnir reconuschids ed onurads uffizialmain e publicamain ed er da survegnir ina atenziun mediala indispensabla per cuntinuar cun success lur carriera artistica.



Era il Rumantsch, Clà Riatsch, fa part da la giuria federala per litteratura.